

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATUK WIRA HAJI AHMAD BIN HAMZAH
(JASIN)**

PERTANYAAN : LISAN

TARIKH : 19.03.2015

Y.B. DATUK WIRA HAJI AHMAD BIN HAMZAH [JASIN] minta **MENTERI KEWANGAN** menyatakan apakah usaha-usaha yang sedang diambil untuk mengukuhkan lagi kemampuan agensi-agensi tertentu mengumpul "*economi/Market Intellingence*" serta membuat ramalan, unjuran dan "*forecasting*" yang lebih tepat agar kesilapan/kelemahan seperti dalam menyediakan Bajet 2015 dapat dielakkan serta tindakan pro-aktif yang jitu dapat dirangka lebih awal lagi.

JAWAPAN

Tuan Yang di-Pertua,

Langkah bagi mengumpul “economic/market intelligence” serta membuat ramalan, unjuran dan “forecasting” adalah dilaksanakan oleh agensi-agensi utama kerajaan seperti Kementerian Kewangan, Unit Perancang Ekonomi dan Bank Negara Malaysia.

Untuk makluman Ahli-ahli Berhormat,

2. Dalam penyediaan Bajet 2015 pada bulan Oktober tahun lepas, unjuran ekonomi negara dan anggaran fiskal kerajaan dibuat berdasarkan maklumat ekonomi global dan dalam negeri yang terkini pada ketika itu serta mengambil kira strategi dan langkah-langkah efektif bagi mencapai sasaran yang ditetapkan. Sejak pembentangan Bajet 2015, Kerajaan sentiasa memantau perkembangan ekonomi semasa dan kedudukan kewangan negara, termasuklah faktor-faktor luaran yang luar kawalan terutamanya ketidaktentuan harga minyak mentah global. Pada penghujung tahun 2014, negara telah menghadapi banjir luar biasa di beberapa negeri terutamanya di Kelantan. Faktor alam sekitar yang di luar kawalan ini turut memberi kesan kepada ekonomi negara dan

kedudukan fiskal kerajaan.

3. Berdasarkan situasi sedemikian dan keperluan segera untuk melaksanakan tindakan pro-aktif bagi menanganinya, Kerajaan telah mengkaji semula unjuran ekonomi dan mengumumkannya melalui perutusan khas YAB Perdana Menteri tentang Perkembangan Ekonomi Semasa dan Kedudukan Kewangan Negara pada 20 Januari 2015. Sehubungan ini, tindakan penyesuaian yang spesifik bagi menjajar semula dasar-dasar negara agar seiring dengan perubahan senario ekonomi global dan dalam negeri yang faktor-faktornya berada di luar kawalan kita telah diambil termasuk ke atas semakan unjuran ekonomi negara. Ini bertujuan bagi memastikan ekonomi negara terus berkembang, di samping menjamin kesejahteraan rakyat dan menyokong langkah konsolidasi fiskal negara.

Tuan Yang di-Pertua,

4. Usaha berterusan ini akan sentiasa dilaksanakan bagi pembangunan kapasiti agensi tersebut secara dalaman di samping melalui kerjasama

dan perkongsian maklumat antarabangsa. Hubungan kerjasama dengan Bank Dunia dan IMF terutamanya telah wujud sekian lama melalui siri perkongsian pengetahuan, khidmat nasihat dan bantuan teknikal serta pengumpulan maklumat ekonomi dan "market intelligence". Pada peringkat dalaman pula, kerjasama dalam kalangan agensi pusat dan badan pelaksana sentiasa dilakukan dalam perkongsian maklumat ekonomi bagi membuat unjuran ekonomi negara yang lebih tepat serta memastikan pembangunan kapasiti agensi tersebut terus cemerlang, kompeten dan berkredibiliti.